

Pɔɔl gbounsinsinn nba ki u din sɔb ki tur **TIMOTI** nae na

Ki j̄in 1 Timoti gbouŋ na po

Timoti din tee Yenweiro nba tee naasimɔe ki nyii Asia yent ni, ki u naa tee Juu niro, ŋaan ki u baa tee Griik niro. Pɔɔl barŋanii somma nie ki Timoti maŋ din teen ŋɔɔ Pɔɔl toontunnanlɔɔ nan u sommtɔɔ.

¹ Min Pɔɔl tee Yiisa Masia toomiie, kimaan ti Tinntɔɔ Yennu nan Yiisa Masia, binba tee ti dindann nae turin li ȳiikoo; ² mine sɔbin gbouŋ na ki teen fin Timoti, wunba tee n bimɔŋ, ti yada paak na. Ti Baa Yennu nan ti Yomdaano Yiisa Masia lomm nan ninbatinu nan parmaasir-ii be nana.

Ki j̄in faak damm po

³ Ii be Efesus nan maa poŋ wanna bianinba, yoo nba ki n din be sɔnu paak ki saa Masedonia na. A kpaan nisiab nba want faak wannu na ki bin nyik ⁴ ki daa fin bi yeejamm ni tianii nan yaadindont kanu nba baat nan mɔniɔk na. Nann ki mɔk sommir ki teen niib ki bi saa tumii Yennu sɔnu; yada paake ki ti bannir. ⁵ Ŋaan n kpaanii maŋ paak tee a lin fin lomm nan popeenn nan dudukŋant nan barmɔnii yadae. ⁶ Ki nisiab nyik linba nawa, ŋaan bot kɔɔ jat labafaant ni. ⁷ Bi loon bii tee Yennu sennu wantteebe, ŋaan ki mi

bi mɔŋ mɔŋ mɔbona paak, ki bia ki mi baa piak linba maŋ paaki.

⁸ Ti mi nan sennu maŋ ŋan, li-i tee ki sɔɔ diar ki tuun nan laa want a tii tuun nann bianjinba na. ⁹ Ii tian nan sennu ki see ninjamm paak kaa, ŋaan li see binba tee mɔyêtdamm na paake, nan binba ki tiin Yennu, nan biitdamm, nan jakint damm, nan binba ki teen Yennu baakir na paak, nan binba kpi bi baanba nan bi naanba, nan nikpiira, ¹⁰ nan binba tuun bonchonchonsin, nan binba mɔk niɔŋ ki dɔɔ nan bi jaleeb, nan binba jaan niib, nan binba tee faak damm, nan binba di faak siara na, nan linba kur ki waa barmɔnii wannu na paak; ¹¹ ki Masia barnjanii nba wann Yennu nba ŋan bonchiann bianjinba na mun wann nnae; ki ŋɔɔ Yennu din teen barnjanii maŋ n nuu ni ki n mɔɔntir.

Ki jiin Yennu ninbatinu po

¹² N teen ti Yomdaano Yiisa Masia niipoouk, ŋɔɔe turin paŋ a man tun u toona kimaan u yet a n jaŋ nan toona maŋa, ki te ki n tuun teenɔ. ¹³ Maa lek din biir u sann ki mukis u niib, ki sukiiɔ na, ŋaan u bia gaarin u ninbatinu niwa, kimaan n din ki mie, ki bia ki teenɔ yada, ki tuun nna. ¹⁴ Ki ti Yomdaano Yiisa Masia tan tinin ninbaauk nba yab ki kaa bikinu, ki te ki n teenɔ yada ki loono. ¹⁵ Nɔɔ Yiisa Masia din baar tingbouŋ na ni, a wun tinn biitdamme; labaar maŋ tee barmɔniie ki ŋan ki ti gaarir ki teenn yada; ki mine din bi ki gar biitdamm kura, ¹⁶ ŋaan ki u tin min nba din tee biitdamm yudaano na ninbaauk ki dii sukuru nanin, a lii

tee siara ki wann binba tan saa teeno yada ki gaar manfoor nba kaa gbennu na. ¹⁷ Dontir nan baakir tee Yennu yare mɔkmɔk nan mɔkmɔk. Nɔɔe tee kpanbar nba kan mi kpo, ki sii be yaa yoo nan yaa yoo; ki soo ki laatɔ; ki u tee Yen-yemmir na. Mamɔmm.

¹⁸ N bik Timoti, n jikit kpaanii maɲ ki tee a nuu ni. Kpaanii maɲ tee nan mɔbona nba ki sokiniinba din poɲ pak a po sianyoo nae. Jiin barii maɲ ki lii tee jatiat ki a kɔn fanu, ¹⁹ ki teen barmɔnii wannu yada, kii tuun linba ki a mi nan li tee toonɲana. Nisiab ki sak nna; li paake ki bi yada biir gbenn. ²⁰ Bi siabe tee Haimeneus nan Aleksander, binba ki n daan jiib ki teen Sintaanii nuu ni a wun mukisib na. Linba nae saa wannib yan ki bin nyik barbiit nba ki bi piak ki teen Yennu na.

2

Ki jiin Masiaweira jiantu po

¹ Li paak, linba kpaa talas tee yii puk Yennu, kii meio, kii boio, kii teeno niipoouk niib kur paake. ² Ii mei Yennu, batnba nan binba kur tee yikoo damm na paak, a tii be nan laafia nan parmaasir, kii tee yentinna, kii be soon nna. ³ Nanne njan ki pent ti Tinntɔɔ Yennu par; ⁴ nɔɔe loon soo kur n bann u maan nba tee barmɔnii na ki wun tinnib; ⁵ kimaan Yen-yenokɔɔe be, ki sindantinno tee yenokɔɔ ki be Yennu nan nisaarik sinsuuk ni; li yooe tee Yiisa Masia, ⁶ wunba din jii u moɲ ki mann mannu ki tur soo kur, a wun nyinnib daabisin ni na; ki bi moont barnanii maɲ yoo nba jaɲ. ⁷ Li paak ki Yennu gannin ki n tee Masia

toonii, ki moontir barnanii manj ki teen binba ki tee Juu teeb na, ki wantib ɲoo Masia maan nba tee barmonii na, a bin teeno yada. Maa beeri linba na, n ki fa faak kaa, li tee barmoniie.

⁸ N loon ki jab-ii mei Yennu siar kur boor. Jab nba set tee popeendamm ki ki mok wutoor koo monok na saa fit donn bi nii sanpaapo ki miar Yennu. ⁹ N bia loon ki poob na mun-ii be nan Yiisaweira nba bo sii be bianjinba na, ki bann chinchengbabu nan talianu nba ɲan nan Yiisaweira. Li-i tee ki bi lorin bi yut nan kut nyinyirit, koo ki piir salinbana amii laan nyinyirit nan tiat nba ki li daauk paar, linba na kaa saa turib fanti. ¹⁰ Linba saa turib fant tee binbenɲaje, nan pooyentinna nba bo sii be bianjinba na. ¹¹ Poob-ii be soon nna kii tumii nan mosaku kur. ¹² Min ki sak ki poosoo n wann jab, amii wuu mok yiikoo ki gar jabi; poo-ii be soon nna; ¹³ kimaan Yennu din nan Adam-e sinsinn, ki li poorpo ki u nan Adam ɲaapoo Iif. ¹⁴ Ki nyik nna, Sintaanii din fit kpann Iif-e ki u biir Yennu sennu na, u din ki kpann Adam kaa. ¹⁵ Naan poo-i teen Yiisa yada, ki loon niib, ki tee popeendaano, ki be soon nna, Yennu saa tinno u matuk niwa.

3

Ki jiin Masiaweira yudamm po

¹ Barii nba na tee barmoniie, ki joo nba loon wun teen Masiaweira yudaano, li tee toonɲanne ki u loon. ² Li ki ɲan ki Masiaweira yudaano-ii mok bisiati. Li kpaalalase ki wuu mok poo yenokoo, kii tee subindaano, kii dia u moɲ fanu,

kii gaan saamm u njaak ni kii chantirib, kii tee wunba saa fit wann niib Yennu maan, ³ ki daa tee daanyuuruku, ki daa tee kpikpiruk daano, njaan kii be soon nna nan parmaasir, ki daa tee liklonbiiuk daano. ⁴ Li kpaa talase ki wun fit dia u moŋ njaak niib fanu, ki te ki u waas n sak u mɔb kii mɔk baakir. ⁵ Njaadaanɔ-i kii mi waa saa dia u njaak niib bianjinba, nlee ki u saa fit dia Yennu niibi? ⁶ Li kpaa talas ki wuu tee daano nba poŋ waa Masia ki li yukira; nna-i kaa, u tan saa mann donn u moŋ nan karinbaanii ki la tubdatu nan Sintaanii nba din tun bianjinba ki la tubdatu na. ⁷ Li kpaa talas ki wuu tee daano nba ki binba ki waa Masia na gbaa n yet a u binbenŋ nan, ki u daa di fei, ki Sintaanii baruk tan saa mann sooro.

Ki jün Masiaweira sommteeb po

⁸ Li bia kpaa talas ki Masiaweira sommteeb-ii munii mɔk binbenŋan, ki daa tee mɔleemii dammi. Bi daa nyu daan* bonchiann, ki bia daa tee liklonbiiuk dammi. ⁹ Li kpaa talas ki bii dia yada barii nba ki Yennu fiit wannit na fanu, ki daa mɔk biiti. ¹⁰ Li kpaa talas ki bin bikimm sinsinn; bi-i kii mɔk biit bi bikinu maŋ ni, bi sii fit tuun sommteeb toona. ¹¹ Li kpaa talas ki bi poob-ii munii mɔk binbenŋan, njaan daa tee sanjaanjanna, ki daa nyu daan bonchiann, njaan kii tuun bi toona kur fanu. ¹² Li kpaa talas ki Masiaweira sommtɔɔ-ii mɔk poo yenokoo, ki bia fit dia u waas nan u njaak niib fanu. ¹³ Masiaweira sommteeb nba tuun bi toona fanu saa la baakir Masiaweilleeb boor, ki bia sii

* **3:8** 3.8 Bi din dia tilɔɔnae ki tee daan.

mok parcheenn ki bet niib baa teen Yiisa Masia man yada bianjinba.

Barɲanii na nba tee barjaann bianjinba

¹⁴ Maa sobin gbouŋ nba teena na, ɲaan n mok dindann nan man baar mɔtana ki la-a, ¹⁵ ɲaan li-i yukir ki n ki baar, gbouŋ na saa te ki a bann taa sii be bianjinba Yennu ɲaaniib sinsuuk ni, binba ki ɲɔɔ Yennu nba fo gannib na. ɲamme dia barɲanii nba tee barmonii na, ki bia see li paak. ¹⁶ Li tee barmoniie nan Masia labaar nba ki Yennu fiit wannit na sumii bonchiann:

U din dɔkit nan gbanante,

Yennu Seyeen wann nan u be fanu;

ki malakanba din lau.

Ki niib din mɔont u labaar ki tur nibooru booru,
ki bi teenɔ yada tingbouŋ na ni,

ki Yennu tan donno sanpaapo ki u la dontir.

4

Ki jiin faakdamm po

¹ Tɔn, Yennu Seyeen set wantit yeenin ni nan yoo nba waa poorpo na, nisiab tan saa nyik Masia labaar nawa, ɲaan sak narinbiit nba saa kpannib na, ki bia wei Sintaanii wannu na.

² Binba want li faak wannu na fa faake, ki bi dudukit ji ki mukisib li paaki. ³ Li nibooru want a jakunt nan pookɔont ki ɲani, a ki jesiat bia ki ɲan nan dinu; ɲaan timm nba bann Masia barɲanii ki teenɔ yada na, ti mi nan Yennu nan jebooru kura, a niib n tuu turo niipoouko li paak ɲaan di. ⁴ Bont nba kur ki Yennu nan na tee jenante. Ti-i turo niipoouk li paak ki dii, li ɲan nan dinu;

ti daa yêen li siari, ⁵ kimaan Yennu yet a li kura ñan; ki taa meio ki teeno niipoouk li paak na, ñanne bia te ki jeet mañ ñan nan dinu.

Ki jiin Yiisa Masia toontunñano po

⁶ Li-i tee ki a jii kpaanii nba na ki tur Yiisa Masiaweira na, a sii tee u toontunñano, ki sii dint a moñ nan maan nba ki ti teen yada na, nan wannñanu nba ki a waa mañ na. ⁷ Daa saak faak maan, kimaan li ki tee Yennu yari; li ki mok nyooti; ñaan a tumii yentinu binben nan ninmonn. ⁸ Fi-i tumii a gbanant bianñinba ki li sii kakii, li mok nyoota, ñaan yentinu binben tumiiu mantik mok nyoot. Kimaan li mok nyoot ki turit tingbouñ na ni motana, nan Yendouñ ni, yoo nba baat na. ⁹ Linba na tee barmoniie, ki li ñan ki niib n gaarir. ¹⁰ Ti gbaae ki tuun nan ninmonn, kimaan ti mok dindann Yennu nba fo na boor; ñoo tee soo kur Tinntoo, mantik binba teeno yada.

¹¹ Wantib ki kpaamm linba na kura. ¹² Daa te ki soo siana, faa daa po na paaki. A te ki a pinpauk nan a binbenñan, nan a lomm, nan a yada, nan a binben-yeen n wann Masiaweira nba bo sii be bianñinba. ¹³ Jiin a yoo nan a yaak kii karin Yennu gbouñ, kii wantib li paak, kii moontir Masia barii na mokmok nan yoo nba ki n tan saa baar. ¹⁴ Daa tammit Yennu Seyeen piinii nba be a ni na po; Yennu din tura piinii mañ yoo nba ki sokiniinba din pak a po, ki yudamm bia yii bi nii a paak nae. ¹⁵ Ii tuun linba na nan ninmonn, ki soo kur n la a kpaatu Yiisa toona ni. ¹⁶ Ii mi a moñ nan a wannu po. Ii dia wannu nba

na, kimaan li-i tee ki a diar, a saa tinn a mɔŋ nan binba ki a wantib nawa.

5

Timoti nba sii dia Masiaweira bianjinba

¹ A daa yakii nan jakpersɔɔ, ŋaan pak turo nan a mɔŋ baa na, kii dia naasimm nan a mɔŋ ninjamm na, ² ki jii pookpera na ki bii tee nan a naanba na, ki poopaanii na-ii tee nan a mɔŋ niipoob na nan binben-yeen kura ni.

³ Ii teen pakɔi nba ki mɔk got-teeb na sommir, ⁴ ŋaan pakɔk nba mɔk waas koo yaaboona, u waas koo yaaboona maŋ n piin ki tumii bi yentinu toona nba tee linba ki tur bi mɔŋ ŋei, nnae ki bi damm mun saa di bi niwubit nyɔɔt, kimaan linba ki Yennu loone na. ⁵ Pakɔk nba be u kuukɔɔ ki kaa sɔɔ, ŋaan ki u dindann be Yennu ni, ki u mei Yennu yoo kur, ŋɔɔe tee barmonii pakɔk. ⁶ ŋaan pakɔk nba tuun chonchonsin, u poŋ kpoewa ŋaan daa be maŋ. ⁷ Wantib kpaanii na ki bii waa ki daa mɔk biiti. ⁸ Wunba ki gorii u nikpiimm, mantik wuu kii fiin u mɔŋ ŋaak niib po, li daanɔ ji ki mɔk yada Masia ni; ki wunba ki tee Masiaweiro gbaa sɔu.

⁹ A daa kaan pakɔi nba daa ki kpet gar bina piinloob na ki kɔont pakɔi kann ni. Linba pukin, li kpaas talas ki wuu tee wunba din kun jɔɔ yenɔkɔɔ, ¹⁰ ki poŋ tuu mɔk sanŋann u toona paak, ki tee wunba tuu mi waas wubiru fanu, ki gaan saamm u ŋaak ni, ki tuun sikin-n-mɔŋ toona ki teen u leeb nba waa Masia na,* ki

* **5:10** 5.10 Koo: Ki wu Masiaweira taapant.

sommit niib nba be fara ni, ki jii u moŋ kur teen toonjana tumu ni.

¹¹ Naan a daa pukii pakɔpoopaanii na pakɔi kann ni, kimaan bi-i tani loon jakunt yoo nba, bi nyikit Masiaweiu li yooe, ¹² ki pot bi mɔsonn nba ki bi din senn turo na,† ki li tee biit. ¹³ Linba pukin, bi bia ki loon toona, naan lin loon nei ki tumii sanjaaun, nan niib barii ni koonu, ki lin piak linba ki nan nan bii piaki. ¹⁴ Li paak, min bo sii loon ki pakɔi nba tee poobis na n kun jabe ki mar waas, ki got bi nei fanu, ki ti datai daa laat yaak ki piak biit ki jiint ti po, ¹⁵ kimaan pakɔsiab poŋ tunn waa Sintaanii-e. ¹⁶ Naan poosoo nba tee Masiaweiro ki mok pakɔi u naak ni, li kpaa talas ki wun gotib fanu, ki daa jikit bi jik-kpiata ki jint Masiaweira, ki Masiaweira na mun n got pakɔi nba ki mok got-teeb na.

¹⁷ Masiaweira saakab nba diab fanu na nan nan baakir nan paauk; mantik binba moontir Masia labaar ki wantib li paak na, ¹⁸ kimaan li sob Yennu gboun ni a “Daa bobint naajak mob, yoo nba ki u boo dii,”‡ ki bia sob a “Toontunno nan ki wun gaar u paauko.”

¹⁹ Ton, bi-i paan saakasoo barii, a daa te ki a baka be li ni, nokira siara damm teen niib banlee amii bin gar nna. ²⁰ Binba tuun toonbiit na, a yakii namm Masiaweira numm ni, ki binba biar na n tin janmaanii.

²¹ Yennu nan Yiisa Masia nan noo Yennu malakanba toonne ki n teena kpaanii nba na, a

† **5:12** 5.12 Bi-i kaan pakook, li wann nan u senn mɔsonn nan u ji kan kun joo. ‡ **5:18** 5.18 Bi booru ni, nei-i boo dii.

fan sak wannu na, ki daa mək ningannii, koo lukitin nan sɔɔ bonsiar ni. ²² A daa mantik jekir ki yiin nii sɔɔ paak a wun teen Masiaweira saakɔɔ. A daa kɔont a nuu siab toonbiit tumu ni; ii dia a mɔŋ fanu.

²³ A laafia nba ki jaŋa na paak, a daa nyu nyun kuukɔɔ, ŋaan a tuu nyu tilɔɔna daan waan ki lin somm a nɔok ni.

²⁴ Nisiab toonbiit poŋ dɔɔ paanu nie ŋaan ki bi daa ki bu bi buuti; ki siab toonbiit mun saa nyi paanu bi buut bunu poorpoe. ²⁵ Toonŋana mun bia tee nnae, li yenn-nba nyii paanuwa, linba lek ki nyii paanu na gbaa, ŋaan li kan fit bɔri.

6

¹ Li kpaɔ talase ki binba tee daaba na n tur bi yomdamm baakir, ki sɔɔ daa piak biir Yennu sann nan u wannu. ² Binba ki bi yomdamm tee Masiaweira na daa fiakit bi yomdamm maŋ, baa yib bi naa waas na paaki, ŋaan li kpaɔ talas ki ŋamme n mantik tun fanu, kimaan bi yomdamm nba gaan bi toona nyɔɔt na teen Masia yadawa, ki Yennu loonib. Ii wantib kii kpaamm toona na po.

Ki jiin faak wannu po

³ Sɔɔ-i want wanŋanu ki ki wei ti Yomdaano Yiisa Masia mɔbɔna, nan Yennu weiu wannu na, ⁴ u gbee nan karinbaaniiie ki ki mi siari, ki bia mək mɔniok nan kunkɔna niɔŋ, ki li baat nan funfunn, nan kunkɔna, nan nisukit, nan pinpakbiit, ⁵ nan mɔniok yoo kura nibiit boor; ŋamm yaa dudukit ki somm fanu, ki ji ki mək

barmonii; bi dukii nan Yennu weiu tee a niro n teen mokitoe.

⁶ Li-i tee ki niro numm gboot waa mok linba, Yennu weiu set mok nyote, ⁷ kimaan ti din ki baar nan bonsiar tingbouj na ni, ki ti bia tan kan nyi nan siar tingbouj na ni, ⁸ naan ti-i mok jeet nan tiat, li nan ki ti numm n gboor; ⁹ naan binba loon bii tee mokita, namme koo jinjammii ni, nan barit ni, nan jatii nioj nba tee dan ki biir niib ki baantib yann na ni, ¹⁰ kimaan likirii lomme tee bonbiir kur jiinn. Nisiab poj jii bi moj ki teen likilonbiiuk nie; ki ji ki teen Masia yada. Nanne teen ki bi laat parbibooru booru.

Pool nba kpaan Timoti bianinba

¹¹ Ton, fin Timoti nba tee Yennu niro na narin, li nan ki a doj nyi linba na kura ni, naan yabir kii be fanu, kii mok yentinbinben, kii tuun Yennu toona fanu, kii loon niib, kii mok sukuru, kii be soon nna. ¹² Yabit a moj kii waa yada sonu nan ninmonn, kii dia manfoor nba kaa gbennu na. Yennu din yiina ki a gaar manfoor mane, yoo nba ki a din nyinn a moj paanu ki tur Masia, niib bonchiann numm ni na. ¹³⁻¹⁴ N kpaanae, Yennu nba teen bont kura manfoor na, nan Yiisa Masia nba din nyinn u moj siarjann Ponsius Pailat numm ni na toonn, a fii dia Yennu sennu fanu, ki li daa mok biit mokmok nan daar nba ki ti Yomdaano Yiisa Masia tan saa dokit na. ¹⁵ Yennu nba ki ti piako na, hoo kuukoee tee Yudaano, ki tee kpanbara kur Kpanbar, ki bia tee yomdamm kur Yomdaano; hooe tan saa te ki Yiisa n dokit yoo nba jan; ¹⁶ hoo kuukoee kan kpo; u be yentchion nba ki niro kan fit nakin

na ni; η̄ōe ki s̄ō daa ki mi lau koo ki saa fit lau; η̄ōe yen paku nan paη̄ yoo nba kaa gbennu. Mam̄omm.

¹⁷ A kpaan m̄okita na ki bi daa m̄ok dont-n-m̄oη̄, koo ki tee bi dindann m̄okint ni, kimaan li m̄okint tee woun̄o; η̄aan bin teen bi dindann kur Yennu ni; η̄ōe turit bont kur a ti gaar kii m̄ok parpeenn. ¹⁸ Bii tuun toonη̄ana, ki bi toonη̄ana maη̄-ii yab; ki bi nii-ii yaa nan piinii turu. ¹⁹ Nnae saa te ki bii m̄ok m̄okint sanpaapo, ki li guub nan yoo nba tan saa baar; ki bi sii fit m̄ok manfoor nba tee barm̄onii manfoor. ²⁰ Timoti, ii guu barη̄anii nba ki Yennu jii teen a nuu ni na. A nyik jat m̄oniok nan labafaanu nba ki m̄ok nȳōt ki bia ki tee Yennu yar, ki siab yir “bannu” na; ²¹ kimaan siab poη̄ yaa η̄amm m̄okir, ki li paak bi nyik Masia sonu na.

Yennu ninkpabaun̄-ii be nani.

Yennu Gbouj Moor
Bimoba: Yennu Gbouj Moor Bible

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 29 Sep 2022 from source
files dated 11 Jul 2022

00d89ba0-4677-52d9-9bc5-aa3d7c5c966d